

四庫全書

史部

欽定四庫全書

史部

硃批諭旨卷二百二十三下

詳校官尚書臣德保

編修臣袁謙覆勘

總校官中書臣朱鈐

校對官助教臣蔡鎮

謄錄監生臣段文新

欽定四庫全書

硃批諭旨卷二百二十三下

硃批尹繼善奏摺

雍正十年正月二十八日署理江南總督蘇州巡

撫臣尹繼善謹

奏為恭謝

天恩事竊臣才識庸愚荷蒙

聖主深恩畀以封疆重任殷殷期望事事提撕勉臣以

所未能宥臣之所不建成全教養高厚難名自愧
巡撫三年毫無寸長報稱署理督篆以來雖竭力
殫心倍加奮勉而地廣事繁不能勝任寤寐之中
悚惶無地茲荷

寵命協辦江寧將軍復奉

恩綸總理兩淮鹽政臣聞

命之下感懼彌深伏思江寧八旗從前廢弛自鄂密達
辦理二年已經漸次整頓若一經放鬆則廢弛甚

穆森

易署將軍正在於此一生惟以謹忍過於和平務不致

易實

都統吳那伊貝何肺臍徹到來未久似能勤敏趨事臣惟有諸

事商酌盡心協理不敢一毫諉卸上履

聖懷鹽政所關甚重臣雖未諳事機敢不加意整頓惟

有仰遵

訓諭悉心禁弊設法緝私凡有應行籌畫之處務與高

斌和衷共濟妥協料理以無負我

皇上逾格加恩陶成委任之至意所有感激愚忱謹具

摺恭謝

天恩謹

奏

竭力勉之但確秉公忠告

天而行諸務無不就緒之理根本既固枝葉自必敷榮也
馬世龍何如可勝此任否

同日又

奏為備陳長江情形酌籌水師營制仰懇

聖訓事竊惟長江跨連數省通湖達海最關緊要沿江

任者上下水陸營汛星羅棋布規制不為不嚴但立一
營必得一營之實濟有一兵必收一兵之實用方
弄虛為措置得宜緩急足恃臣事機未諳愚昧無知荷

蒙

聖主深恩署理總督印務懼職任之難盡恨營伍之廢弛數月以來竭力整頓設法稽察務冀技藝純熟汛防嚴密以無負我

皇上教訓期望之至意而兩江水師情形多係有名無實臣悉心諮訪通身籌畫其中未妥之處愚見所及有不敢不據實陳

奏者京口為江淮鎖鑰南北咽喉將軍親標兩營駐劄府城俱係陸路江陰副將左右兩營雖係水師止守沿江汎地所有京口沙船五十六隻艍犁船三十二隻配搭八旗官兵乘坐操演實為江省水師之重鎮今查兩項戰船共水兵一千四百餘名

却為將軍親標陸路兩營管轄陸路將弁既不熟
諳水性且船隻水手駐劄之高子港去鎮城數十
里不能兼顧除春秋兩操而外俱各游手好閒不
但無人訓練亦且並無器械徒有兵名究無實濟
此京口水師不妥之情形也江寧為省會重地襟
帶長江居京口狼山上游從前並無水師雍正五
年欽奉

諭旨令江寧駐防滿洲官兵學習水師部議於八旗滿

洲蒙古馬兵內挑選一千名派協領四員佐領防
禦驍騎校各十二員撥京口將軍標沙船二十隻
共水手三百餘名令江寧將軍督率每逢春秋二
季操演八旗官兵實為有益但教習水兵必得設
有專員當日部議止令於鎮江千把內揀選四員
遇水操之時令其前往江寧分配旗員教習至止
操之時仍回原任無論暫時派撥之員並無責成
難收實效即鎮江千把亦不能教習水師而佐領

等官不能熟諳旗下事多不能在城外彈壓雖輪班照看並無專責至今三百餘兵不但未置器械未習技藝且家眷仍在鎮江高子港春秋臨時應差其餘之日多半來往京口而經管旂員除捕盜舵工之外尚皆不能熟識一旦需用官兵俱不聯合人船總不湊手此江寧水師不妥之情形也狼山為長江尾閭大海門戶總兵親標三營有戰船二十二隻定例春秋出洋操練江汛每月會哨邇

年以來狼山營伍疎懈春秋不過駕沙唬船數隻
每船配兵數名並不出至大洋止於江口來往幾
次草率塞責水面不能熟嫻焉望衝鋒破浪至於
江汛會哨虛應故事止以空文具報會與不會漫
無稽查更可異者趕繒大船原係出洋利艘而竟
泊於狼山港內高閣沙灘從不出洋操練廢棄戰
船虛糜糧餉此狼山水師廢弛之情形也現在狼
山營務臣已面交署總兵王廷梅令其逐事詳稟

徹底清查將船隻之安放不妥者擇地位置水兵之漫無紀律者教以技藝並諭以會哨之法令其實力操演臣復派員前往監查務必力挽積習實心整理外其京口將軍標水兵一千餘名若不另行籌畫難收實用請將現住高子港水兵一千四百餘名另設水師都司一員千把各一員駐劄高子港專管船隻督率水師並歸江陰水師副將兼轄除春秋與旂兵合操外閒暇之時即教習藤牌

挑刀各種技藝則駕船之水手即精練之勁兵操船則馳縱江洋停操竝可資防禦庶無用者咸成有用矣江寧將軍船隻俱在江邊停泊其水兵三百餘名因無棲身之所前將軍鄂密達曾經商酌臣已撥與隙地似宜酌蓋營房將水手家眷搬至江寧以免數百里往返奔走請另設水師守備一員把總二員專司其事仍歸將軍統轄其素日管理水師旗員仍令兼管除配八旗官兵按期操演

外平時責成守備看管船隻教習兵丁技藝與西岸浦口營相為對待再添吧唬船四隻以便巡緝則城外江邊又有營頭防守實為嚴密抑臣更有請者江寧京口旗下官兵雖一年兩次操演而此外總不駕船終難熟諳以後京口江寧應每月各於佐領協領等官內派出二員輪駕船隻酌帶兵丁巡查江面其狼山鎮標除專管海汛之右營官弁每月駕船巡視海面外中左兩營亦宜每月輪

派將備駕沙唬船二隻於江面游巡如此則水手
得以熟習旗兵又可勤練而長江數千里形勢連
絡遠近聲援庶於武備少有裨益矣為此據實陳

奏伏祈

聖主訓誨遵行謹

奏

此奏可嘉之至欣悅覽焉將所議機宜與該將軍等悲
心籌畫務期盡改舊習整理妥協應奏請者具疏題請

勉之其間設有立異掣肘不肯實力奉行之人密摺奏聞朕自另有處置

同日又

奏為奏

聞事去年十二月二十日常州府知府魏化麟因公赴蘇二十一日晚府堂上忽有皮箱一隻隨經營縣各官公同啟視內有圓木戳六箇上刻花紋又方木戳五箇俱無字跡又方木板一塊上刻人首龍

身中刺辛字又一塊四角刺十兩銀子四字中刺
亥字又紅手本一箇上書中天淨梵王頒行鈔格
鑿定辛亥十兩銀子敕命御弟同受掛印兼領鑲
旗排日輪管印鈔令御弟十五同伴看印半月接
駕以刺壬子此敕等語甚屬誕妄密飭知府遊擊
訪拏嚴究隨獲道士趙秉中據該府訊供因昔年
請仙有云號作中天淨梵王筆端常吐玉毫光所
以自稱中天淨梵王圓木戳係中天淨梵王印方

木戳係侯印木板刷印即代銀用并稱字帖內同
受二字下有排日輪管四字兩句內暗裝管同受
三字先年曾被管同受出首伊銅銀一事致受枷
責欲借此報復故將此送至府堂等語及傳管同
受到案質訊雖曾有出首假銀之事而道士語言
怪誕非盡實情再訊據伊徒吳康生供稱有江都
邵伯鎮道士劉譽山丹陽東嶽廟道士周丕文還
俗道士曹子斌俱與趙秉中相好周丕文曾送一

本奇門遁甲與趙秉中曹子斌平日同趙秉中密
商云蘇州沒有人那些鹽販子漢仗倒好等語又
於趙秉中處搜出手本自稱係宋朝之後肆行狂
吠悖逆之至臣思道士趙秉中雖故作瘋癲而膽
敢狂肆妖言惑眾必有姦徒黨羽助惡為匪自宜
直窮到底盡除根株臣已差員飛往親提該犯細
心究審將供出黨類一並嚴拏外合先繕摺奏

聞謹

奏

事非偶然豈無情故凡值此等案件務須窮究根底毋得稍有疎畧若信其瘋癲遂朦朧縱捨以為省事之舉則大誤矣

雍正十年閏五月十五日署理江南總督蘇州巡撫臣尹繼善謹

奏為請留効力人員事竊照江省庶務殷繁差遣委用在在需員現在辦理版圖順莊清釐口岸私鹽

積弊幅員遼濶頭緒繁多必才具敏練熟諳風土之員方為有用臣仰體我

皇上愛惜人才至意留心體察有原任上元縣知縣唐際運因審理竊案未協經前署督臣題叅革職原任徽州府通判李鏗因署合肥縣任內失察戶書侵蝕部議革職原任鎮洋縣知縣陶士傑因帶徵錢糧未完部議降調先經送部引

見奉

旨著照所降之級調用此數員者為人謹慎才具可用
皆臣素知且均係因公罣誤任內並無大過又有
原任河標右營遊擊白舉因公出境遲報盜案經
前河臣題叅革職該員弓馬嫻熟辦事敏幹若委
緝捕巡鹽甚為得力可否留於江省差遣効力酌
量委用伏候

諭旨將唐際運李鏗白舉送部引

見欽定臣因地方公務需員冒昧具

奏伏祈

睿鑒謹

奏

唐際運等准照該督所請留於江省酌量委用免其送部引見該部知道

雍正十年九月初七日署理江南總督蘇州巡撫

臣尹繼善謹

奏竊照安徽巡撫臣程元章奉

旨署理浙江總督印務於九月初三日送印到臣暫行
接受署理署撫臣徐本尚無到任日期其一切事
務現在日夜兼辦上下兩江學政印務蒙

恩交臣暫署凡錄遺補考之事已經辦理清楚俟兩學
臣科場事畢即行交印抑臣更有請者江南為人
才之藪文風甚盛但邇來好逞才氣未免趨於華
靡近奉

諭旨訓導務令文體雅正此誠崇實去浮表正風俗之

要道而司其事者全在學臣江蘓學臣張廷璐為人謹厚鑒別公明處處人情帖服今歲十月例應報滿仰懇

聖恩再行留任定能仰遵

訓誨拔取實學轉移文風於士子甚有裨益為此不揣冒昧具摺奏

聞謹

奏

張廷璐留任江蘇朕原有此意未及降諭耳上江學臣王蘭生聲名如何朕亦欲再留一任

雍正十一年六月二十九日雲貴廣西總督臣尹繼善謹

奏為恭報大捷事竊照元江臨安一帶賊勢猖獗臣到任後查得軍前官兵單薄隨星飛調派委鶴麗鎮總兵官楊國華帶領前往元江總統與臨元鎮總兵官董芳協力勦除適逆賊分攻元江瓦渣兩

處幸大兵一到立時奔逃臣復嚴行臨元兩路總
統分遣將備竭力追勦務在探確賊蹤擒拏賊首
不許止圖趕散以貽後患嗣因分路追擒賊情窘
迫欲侵蒙自內地而佈置甚嚴不能飛越欲竄入
普思茶山而江邊要隘防範更密旋據稟報逆賊
多人藏聚於元屬之腊縱地方恃險抗拒臣即飛
催兩路官兵尅期進勦於五月十八日直抵賊巢
合力圍攻半月奈賊寨懸崖絕壁柵固壕深鎗礮

標弩滾木擂石無一不備官兵自下而上用力甚難傷損兵練不能遽破臣以行軍之道巧力兼施賊寨雖堅或宜黑夜火攻或用夷人作線內應自應多方設法若曠日持久軍力疲憊勢必致賊遠颺隨遣標員執持令箭往軍營守催如有退縮不前者即以軍法從事茲於六月初九日總兵董芳用附近夷人夜間潛入賊寨舉火各路官兵士練奮勇衝入乘勢斬殺共斬逆賊首級一百有餘生

擒六十九名奪獲從前所失鎗礮並刀弩器械甚
多查點是日損傷兵練共十餘人所斬首級一一
令賊犯識認有腊縱賊首波鋪波蘇過布渣罵賊
首比戛米克賊首又渺俱已被殺腊縱賊穴始克
蕩平臣甫經到任諸事未諳正值賊勢猖狂非不
知瘴烟暑雨天時地利均處其難但希圖省事必
至蔓延苟且目前終為大患是以日夜經營不遑
寢食與撫提諸臣悉心商酌和衷共濟仰賴

皇上天威攻克賊巢遠近兇頑無不聞風儆懼元臨內地已皆處處安堵但逆巢雖已勦滅餘黨尚宜清除乘此兵威大振臣飛飭總兵楊國華清理元江之永豐里渣罵一帶總兵董芳清理臨安之藤條江一帶務使妖氛肅靖邊境安寧以盡職守仰慰聖懷再普思攸樂一帶餘孽未清先經酌派官兵前往駐防現在雖不敢猖肆而畏罪藏匿山箐者間有為饑餓所迫黑夜搶擄一經官兵追拏即逃躲無

蹤臣嚴飭文武各官一面搜擒一面上緊招撫陸續已有投出之戶俟臨元軍務一竣相度情形次第料理所有元臨報捷緣由合先繕摺奏

聞謹

奏

以手加額欣悅覽之汝甫經到任兩路官兵俱各報捷可卜

天心嘉佑於汝朕深為汝慶但能秉此忠誠對越

天地神明自必利有攸往切勿稍存矜伐之念勉之

雍正十一年九月二十一日雲貴廣西總督臣尹

繼善謹

奏為奏報年歲豐收事竊雲貴二省今歲雨水調勻
禾苗暢茂茲值西成天氣晴霽稻穀籽粒飽滿堅
實菽豆雜糧俱各十分豐熟現在處處收穫廣西
一省夏間雨澤稍遲收成較遜約有七八分不等
若雲貴二省詢之農民咸稱今歲較往年所收實

一年有二年之獲米糧價值日漸平減窮簷蔀屋
共慶盈寧此皆仰賴我

皇上敬

天勤民福澤廣被萬里邊陲年登大有理合據實

奏報恭慰

聖懷謹

奏

覽三省收穫情形深為邊氓額慶

雍正十一年十一月二十九日雲貴廣西總督臣

尹繼善謹

奏為奏明元新賊首盡行投誠事竊臣因去年新平賊首楊昌奉普成忠普阿黑等並今歲元江賊首播荷老常小名頭三比等尚未就擒於元臨兩路仍留官兵駐劄令總兵董芳楊國華居中調度分遣各土目四路查緝一面出示招安諭以投誠減罪所有逃竄逸賊俱即陸續獲解其賊首數人自

料不能走脫隨據叅將吳朝應稟報普成忠普阿
黑自磨沙江到營來投適值派撥土練進勦普洱
懇求效力贖罪已准令隨營前往又據總兵楊國
華稟報土弁施膩勒自江外帶賊首楊昌奉並伊
大頭目普兆龍卞朶楊昌禔及後生四十餘名到
他郎行營來投又有新平賊首烏圖哈厄朱榮章
保得甫楊哈資哈牛老八元江窩泥賊首李正同
伊子老大阿二等俱各先後投出再元江一帶播

荷老常小名頭為倡亂渠魁被土弁施糲利遣人
尋獲欲求招安臣以既經尋獲非悔罪自投可比
不准招安現在押令緝拏三比如逾限不獲即行
拏解又據土目方景明將三比之賊黨使扒阿打
合家拏解供出三比藏翅古箐內已經派練往
拏大約不日可獲統計去歲圍攻新平及今年侵
擾元臨之大賊首除從前擒斬並解省外餘皆陸
續投誠伏思此輩蠢獮聚眾作惡罪不容誅今既

出投何難立時擒斬但臣出示招來誘而殺之不足示威彰信且恐餘黨聞風不出孽根難淨故懇求用命殺賊者已令隨營效力情願招擒逸賊者已令人管押訪緝總俟軍務完竣之日拘至省城除拏獲及尋出者法無可寬外若自行投誠又實在效力者仰懇

聖恩姑免其死發至黑龍江等處永遠監禁庶足以彰軍威而昭誠信申法令而靖地方所有賊首投誠

並據臣愚昧之見具摺

奏明恭請

皇上訓示以便遵行謹

奏

觀所料理頗屬妥協周密惟自行投誠之輩既云不忍
誘殺許其隨營效力事竣之後又復充發監禁仍不足
以示威彰信朕意應拘集省城分別約束安插為是如
再干法紀宣示其惡誅之未晚至於烏圖等屢次反覆

非他賊首可比於大軍凱旋時傳齊各土目明以正法示衆可也

同日又

奏為奏明普思軍務勦撫情形仰祈

睿鑒事竊攸樂思茅一帶餘孽未清經臣派調兵練選
妥將備統領進勦業經繕摺具

奏查普思地方遼濶大兵一到勢必四散奔竄必須
分路密佈併力進攻方克有濟隨與撫提諸臣悉

心商酌將進勦兵練分作東西兩路東路之兵一
由紅藤箐黨戛黨別出慢岔河底一由思茅糯竜
那列慢蚌等處至茄色猓所及磨胖三達一於孔
明山莽通莽瓦以及小猛崙等處分佈堵勦俟三
路事竣即會合攸樂清理三十六寨西路之兵一
由關鋪板角一帶一由白馬山圈羅一帶搜勦俟
兩路事竣即會勦六困復恐逃往江外又分調各
土目沿江堵禦隨據總統護鎮周儀具報各路兵

練俱於十月初間先後自普洱前進臣又思思攸
一帶地廣箐深若不恩威並用勦撫兼施不特遍
行搜勦曠延時日且頑苗性多疑畏必致蔽匿反
覆查有刀興國之胞弟刀輔國前因律應緣坐解
省羈禁但輔國當伊兄悖叛之際即出示安慰夷
民撥人守護城池又搬運糧米進城並無異志著
有勤勞又甚得彼處夷心故不敢拘泥成例將伊
家口留省看守令其隨軍效力並查元江投誠賊

首普成忠普阿黑熟習彼地情形適當派兵進普
二犯懇求前往亦令隨師效力續據周儀稟報兵
至腊門口攻開賊柵一十五道追至龍潭箐見賊
寨五所羅列山頂山勢險峻即督兵練奮勇直上
逆賊踞險拒敵我兵鎗礮齊施打傷甚衆餘皆滾
箐又據遊擊張其貴稟報率領兵練前至圈羅一
帶躡見賊扎木城二道當遣刀輔國前往招安各
賊即俱解戈投誠又陸續據各路將備稟報沿途

攻勦所到必克斬獲頗多官兵止傷數人先後招
出夷民八十餘寨皆云從前實係被脅從賊今俱
傾心投誠哀號懇泣臣等飛飭地方官查明安插
復愷切曉諭不致復被煽惑又據總統周儀稟報
黨戛黨別莽通莽瓦等處賊人因官兵屢次擊敗
俱遁聚於糯怕地方現在分路圍勦等情臣查糯
怕與九龍江橄欖壩等處逼近即飛飭將各處隘
口嚴行堵禦合力擒勦務期一鼓成功其去年漏

網賊首數人飭令設法追拏務期必獲在案茲於十一月二十四日接到

皇上硃批奏摺並大學士鄂爾泰頌到

上諭覽尹繼善所奏一應料理似俱妥協元臨一帶雖現已平定若賊首尚有未獲即草率完局目前欲圖省事日後仍將多事是當乘勢清除者至攸樂思茅一帶路通莽緬外夷又非元臨內地可比若徒恃兵力無術以制其心恐進則竄匿退復猖狂縱隨勦隨

撫亦終無以善後擒縱之間著尹繼善周詳籌畫慎重為之欽此臣跪讀之下仰見我

皇上聖謨廣運

睿慮周詳高出尋常萬萬伏思攸思一帶實非內地可比撫治外夷之道實與內地夷人不同不用兵威固不足以示懲創徒恃兵力亦終無以服其心臣知識短淺未諳機宜惟有仰遵

聖訓與撫提諸臣詳悉籌畫務在多方設法操縱得宜

以期寧靜邊疆永遠善後所有現在勦撫情形竝
欽遵

諭旨料理緣由謹具摺奏

聞謹

奏

勦撫名雖二事恩威用豈兩端當撫者未妨明示優容
當勦者亦宜顯施斬馘俾其知順則利而逆則害方可
期近者悅而遠者來今此目前攻心之師即寓將來善

後之舉是乃仁術非關詐謀寧止綏靖普思將見信乎
莽緬也識之

同日又

奏為要地亟需幹員仰祈

睿鑒事竊總兵一官有彈壓地方督率營伍之責而邊
疆重地尤為緊要必須精明幹練之員方克勝任
查得開化鎮總兵官仇元正才具庸平年近七旬
精力衰憊諸事不能整理開化地方南接交趾西

控元臨實非衰老之人所能勝任其平日居官尚

所奏無劣跡仰懇
聖恩可否准令休致

查廣西新太協副將崔善元雲貴

崔善

出師著有勞績前署左江鎮事務亦能料理安協

勝總

臣調來驗看雖才具不甚優長而為小福樸辦事

識機

宜實心於邊詢之屬相宜可否以之補授開化鎮總

驗奏聞
睿裁儻蒙

兵員缺伏候

過其實云云可且令署理卿留心體

聖恩俞允其新

太協副將員缺亦屬緊要查有雲南鎮

稱此

雄營參將

余坤生為人誠實歷練營伍於新太副

將似能勝任鎮雄地方隣近昭通威寧其參將一

可觀

缺亦須強幹之員有竊麗鎮標右營遊擊哈尚德材

雄甫

經改流且與昭威接壤甚需調劑當選擇老成以之

員委

不揣冒昧繕摺尚德遇內地缺出題補可耳

奏請伏祈

睿鑒謹

奏

覽

雍正十二年二月二十九日雲貴廣西總督臣尹

繼善謹

奏為奏明辦理元新賊首情形恭請

聖訓事竊元新賊首楊昌奉等前經陸續投出臣以各犯聚眾作惡罪不容誅今既投出殺之不足以示

威彰信當經繕摺

奏請俟軍務事竣將各犯調至省城發遣黑龍江等處監禁以伸

國法以靖地方隨據總兵楊國華具報賊人三比藏匿翅古箐內逞兇拒捕現今土目帶練押同投出之賊首老常小名頭前往擒拏等語臣查三比一賊甚屬兇頑老常小名頭原係一黨責成擒獻支吾多日並不實心出力不便再留軍前致有他虞

即飛飭派撥官兵速擒三比一面將老常小名頭
先行解省去後乃楊國華專任土目遷延月餘既
不發兵又不將老常小名頭拏解臣嚴飭再三楊
國華始令守備馬漢勛帶兵前往而三比先已脫
逃老常小名頭見三比未獲亦畏罪遁匿臣聞報
之下不勝憤恨現在嚴飭楊國華勒令守備馬漢
勛土目施糯利跟蹤窮追設法緝拏此雖楊國華
奉行不力之咎即臣調度未妥之罪也因思投誠

各犯多隨軍前若不及時辦理必致乘機效尤況
烏圖一犯前雖據報投誠已經露面而性情狡猾
止以招覓逸賊為詞總不肯親到大營誠恐已投
賊首被其煽惑復至漏網所關甚鉅隨飛行楊國
華將楊昌奉等作速調齊明白曉諭押令來省普
阿黑普成忠二犯在普洱軍前又飛行副將周儀
將伊等所帶後生先行分遣即將普阿黑等拘送
來省乃楊國華脫卸已責將楊昌奉等各賊首先

已押交新平臣因飛諭新平文武作速押送恐其
抗違不服必先預備防範然後舉動乃於正月十
四日傳齊曉諭令其來省而賊首楊路支等抗不
遵依身帶利刃蜂擁奔逃其後生數十人亦羣起
猖肆當經新甯營叅將魏明等督率伏兵立將楊
路支楊哈資卡朶普兆龍普光天普宏得耶休奈
七犯登時斬殺並將兇惡後生斬殺十二名餘皆
拏禁幸未免脫其楊昌奉楊期得未敢放肆已遵

諭解省隨據周儀將普阿黑普成忠亦經解到臣
以各犯原係投誠當撥給房屋居住並將伊等妻
子給還加謹看守恭候

諭旨再行辦理烏圖一犯看其情形不肯實心就撫已
自回元江老是達地方現在設法擒拏務期必獲
以除後患茲於正月二十九日臣齎摺人回欽奉
硃批諭旨臣跪誦之下仰見我

皇上睿慮高深

聖謨廣遠於用威彰信之中寓仁至義盡之道臣才識短淺荷蒙

聖恩逾格獎勵指示周詳敢不悉心籌畫妥協辦理伏查楊昌奉等久居新平兇惡素著前歲倡首悖逆攻城劫寨殺掠焚燒元新一帶處處受其荼毒現在人民莫不痛心切齒昨自新平起解來省沿途夷裸見者無不跪拜畏之如虎誠有一呼百應之勢今若仍將伊等安插原籍則觸目成仇餘黨易

集斷不能相安無事若即在省城安插又不便嚴
加禁守此輩秉性兇頑難受拘束倘或逃走滋事
必致又費周章且內中普阿黑原係發遣江南逃
回之犯相隔萬里尚能逃回故土勾結悖叛咫尺
本省安能保其帖服臣輾轉思維不揣愚昧再懇
聖恩可否俯如臣前摺所請俟軍務事竣將伊等解部
發黑龍江等處監禁或即在雲南省城給以衣食
永遠拘禁庶頑夷知有法紀而地方可免後慮臣

因慎重邊疆起見冒昧瀆請伏祈

皇上訓示遵行謹

奏

覽奏知道了楊昌奉普阿黑原係舊土司支派名雖授
首實難望其自新茲觀楊路支等抗肆情狀則若輩亦
何容姑息自應解部發遣黑龍江安插免貽後患至於
三比烏圖等犯尤屬渠魁斷不可疎漏乘此兵威嚴飭
楊國華速行盡力擒拏梟斬示衆倘不就獲楊國華性

命繫焉將朕諭旨明白示之

同日又

奏為奏明整頓三省營伍情形仰請

聖訓事竊惟雲貴廣西均係苗疆接連外域修明武備
最為緊要臣赴滇時隨路考驗到任後悉心體察
三省營伍因連年出師一切軍裝器械頗多損壞
兵丁技藝甚覺生疎不肖營員尚有佔食空糧而
匠役廚夫以及書辦頭目所佔之伙糧為數不少

臣目擊情形心懷悚惕因痛指積弊通檄嚴查除
頭目伙糧前已

奏請清出另養餘丁外其廚夫人役所佔之糧已嚴
行禁革佔食空糧之將弁已經查出嚴行糾叅營
中書辦一分步糧實難辦公現在核減酌留不許
仍前多存空糧以虛營伍烏鎗一項實為營中利
器乃各營之鎗大槩長短不齊鏜口不淨不能有
準致遠雖經提臣蔡成貴條奏動項修製經部議

准尚未即辦臣以此事萬不可緩但通身另造未免糜費因令滇省各營細加選擇可用者存留不可用者改製恐各營不能合式特製樣鎗令其照造已經陸續動工其黔粵二省亦咨商提臣通身確查一體整理烏鎗之法固不外進步連環務期手足熟嫻進退便捷施放聯貫中的有準方為有用臣親操標兵指示法則以為表率並於通省每營調鎗手一排隨標學習熟練之後發回本營照

式教演其餘弓箭藤牌俱皆勒定期限上緊操練
但思教兵之法必長兵短器交相為用而後遠近
有備迺邊省所恃者惟在烏鎗夫烏鎗原係利器
第苗猺人多用長杆環刀如崎嶇山徑或黑夜
攻營一旦撲挑近身烏鎗湊手不及雖有腰刀又
素未學習刀法持二尺之鈍鐵敵丈餘之長桿兵
丁膽怯必至受累前車之鑒厯厯不爽臣過鎮遠
時與哈元生細談及此亦深以為然臣隨細心商

酌添製雙手刀並長鎗二種令弓箭手分學凡鳥鎗手亦必兼學單刀已從別省尋覓教師教習標兵並於通省每營各調數人學習分教三省撫提諸臣亦皆同心協力現經一體辦理平日操演即於鳥鎗之後以藤牌二名雙手刀二名長鎗二名聯為一排鳥鎗放畢即長短相間突出衝擊庶乎遠近有備可以緩急無虞再用兵之道固在隨機應變因地制宜而一切規矩準繩所以熟其耳目

練其手足鼓勵其忠勇之志氣者全在講究於平日乃各營所演陣勢多事虛文並無實濟且一省之中彼此不同甚非體制臣咨行三省自撫提總兵以至將官俱令各就所見將平日操演之法造冊送閱不但驗其才識竝以廣臣見聞今據陸續送到內惟哈元生之式尚屬簡明其餘俱參差無當而亦有可以節取者臣現在悉心考訂斟酌繁簡將何以行軍對陣何以設伏安營何以視金鼓

旗幟為分合進退縱橫變化之道一一講求俟規模酌定仍與撫提各鎮諸臣細心商確然後繪圖貼說分發三省使皆畫一遵行但恐奉行不力仍屬故事臣並勒定期限期操演純熟使各營出具甘結到日再委鎮協大員錯綜查驗分別勸懲仍諄致撫提諸臣共殫忠誠相助為理務期營伍整頓武備修明以仰副我

皇上慎重邊疆委任臣工之至意但臣才識庸愚深恐

料理未當仰懇

聖恩詳加指示以便有所遵循謹

奏

整頓營伍修明武備原為封疆第一要務果共殫忠勤
亦何難料理汝見及此深愜朕懷惟是操兵之法無論
聯排聯伍用短用長總期熟嫻方收實效即雙手刀長
鎗等械固宜兼學亦未可一律拘泥至云熟耳目練手
足鼓勵志氣是矣若臨敵對陣縱橫變化之術豈繪圖

貼說定限取結而兵弁遂能演習精妙者乎故曰神而明之存乎其人徒法不能以自行也此諭其詳加體會

同日又

奏為備陳清查雲貴廣西三省各營公費生息情形

仰祈

睿鑒事竊查每兵百名存留公糧二分以為營中公費
誠我

皇上體恤兵弁之深仁整頓營伍之良法為武員者自

當悉心料理盡歸實用方於營伍有益乃查三省
各營公費多不清楚或任意濫費浮冒開銷或竝
非公事混行私用或借造冊為名而司道書役恣
意分肥或指稱打點部費而京外提塘暗中索取
以有限之公費混用者去其大半所有軍裝器械
馬能整理臣到任後通身嚴查立定章程應用者
分晰款項浮費者痛加減裁凡從前用之不當者
臣準情酌理可寬者免其已往應追者責令賠償

其中有玩法太甚者自當查明叅究並會商提臣
通頒冊式令各營將所用公費條款詳細登註按
季造報逐款查核不許絲毫冒濫此臣清釐公費
之情節也再生息銀兩我

皇上愛養兵丁特發帑金賞給營運以資窮兵緩急此
誠曠古未有之

鴻恩陞任督臣鄂爾泰仰體

皇仁通盤籌畫議將督撫提鎮各標所領銀兩一體均

分各營營運凡經管將弁自當實力經營俾本銀清楚利息充盈窮兵早得接濟乃雲南生息銀兩多有營員借用客民借貸及放債兵丁取利盤剝者伏思

皇恩賞給原令設法營運若取兵之利以為賞兵之用似覺於理不順况遇逃亡事故無人賠墊勢必虧空至於官員私借更屬違例借端一開人人皆生覬覦交相弊混彼此通那日久無力清還帑項必

歸無著臣深悉其弊不敢因循現在委員徹底盤查凡官員之借欠立刻嚴追客民之借貸勒限歸款其兵丁之借項行令分季扣還所開典當有不值號件俱著落經手之人償補俟查明之後有情弊不可寬恕者定行嚴叅究處務期徹底澄清再為因地制宜熟籌營運使帑項不至侵虧兵丁早沾實惠再貴州廣西生息銀兩從前

題准亦照滇省均分辦理迄今二載貴州止有撫提

並安籠鎮標已經領銀營運其餘尚未分領臣思黔省山多地僻貨販稀少若將銀兩按營分散則偏僻之處勢難生息必至本銀沉擱且過於零星礙難稽查莫若將通省應領之四萬餘兩儘巡撫提鎮大標及衝繁營分之地成總營運將附近僻小營分應領之數歸併帶辦所得利息算明均分給賞不但查核甚易亦且滋生倍多現在咨商撫提行司詳議廣西生息銀兩久已分定歷年營運

頗有利息但偏僻營分本銀尚多壅滯亦經會商
撫提衷多益寡通融辦理其現存利銀據撫臣金
鉷行令分貯酌借臣以借之一道總非善策查扣
至去歲年底已共有利銀九千餘兩量入為出儘
可敷用隨酌定賞格自本年正月一例開賞其各
營有無虧空亦現在委道府各官通身盤查出結
具報所有清理三省公費生息情形理合據實詳

細

奏明仰祈

睿鑒謹

奏

存留公糧原以資助辦公凡應用之項自不宜過於裁減若指借名色濫費浮開既無補營務且反滋弊竇則是無故多此一事矣應徹底清釐者至於生息銀兩經營固須有法委託尤在得人該將弁等果肯盡心籌畫如自理家財即僻地小營未嘗不可滋息倘或膜外視

之雖大標衝郡取贏較易亦豈能免借貸通那之弊乎
所奏已屬周密其更加詳察妥酌勉力為之

雍正十二年七月二十三日雲貴廣西總督臣尹

繼善謹

奏為滇粵全河告成事竊查滇省僻處邊隅不通舟
楫處處崇山峻嶺商旅難行百貨騰貴是以開通
河道甚關緊要查由滇通粵有土黃一帶河道發
源於滇省廣南府之分水嶺合師宗州西隆州諸

山之水滙聚成川自土黃起經西隆西林土富州
土田州諸境過剝隘而至百色共計七百餘里可
以直達兩粵旁通黔楚前督臣鄂爾泰以此河若
得開通滇粵兩省呼吸聯絡招徠商賈轉運糧糈
實為萬世攸賴因於彙陳全滇水利疏內並請勘
修旋值鄂爾泰進京而粵西屬員怠玩因循多稱
難於開濬遂至彼此益生疑沮委勘數年竟無定
見臣到任後備考圖籍密訪情形稔知此河水源

長遠易於施工據實估修所費有限隨遴委王廷琬前往確勘總理又委粵省之泗城府知府張任滇省之原任昭通州知府陳克復督率各地方官協力分辦於滇省司庫官田變價項下撥銀六千餘兩齎往招募夫匠分段興工疏濬開鑿計自雍正十一年十二月起至本年五月已將全河七百四十餘里一律開通隨照貴州湖廣灘河駕使之麻陽船鰵船式樣成造試行往返無阻現在廣東

之三板等船已有載貨前來沿河交易嗣後四方
商賈聞風奔湊財貨可以流通且運鉛運錢可省
數百里之旱路滇粵兩省受益實多除沿河安設
塘汛建葢店房等項次第料理現飭承修各官俟
水落之後再將新修各工收拾完備委員確勘酌
定歲修務期永遠鞏固並查實用過工料銀兩造
冊報銷外所有全河開修告成緣由相應先行
奏明再土黃地名原係土人傳述誌乘無稽此河在

西林縣境居多西林為古上林地方伏懇

皇上寵錫嘉名用昭久遠再全河七百餘里賴有

神靈保護素聞土黃一帶三四月間即有瘴氣且山水暴發不常今自開工以至竣工河流平穩天氣晴明人力易施事半功倍且匠夫數萬一無傷損實有默助成功倘蒙

皇上敕建河神祠宇獲從報享之典則

皇仁優渥宣播遐方山川均被光華邊氓益增慶慰矣

是否有當統請

聖裁謹

奏

此舉可嘉之至其建立祠宇併祭祀典儀交該部議奏
矣候旨遵行

雍正十二年十月初十日雲貴廣西總督臣尹繼
善謹

奏為恭報三省豐收事竊查雲貴廣西三省禾苗自

裁袂以來雨暘應時長發暢茂茲雲省於八月後
天氣晴明早稻晚穀顆粒堅實現在收穫登場約
計通省十分者多間有八九分不等菽豆雜糧較
往歲更為加倍米糧價值日漸平減菽麥賣至三
四錢一石洵稱大有之年貴州廣西二省收成亦
與雲南大槩相等閭里盈寧羣歌樂利伏念雲貴
地方自夷獠滋事連歲出師民生困於兵火民力
疲於轉輸休息無時補救匪易幸蒙

上天宏慈默佑我

皇上景福駢臻於地方安定之後屢慶豐年得以少蘓
民困臣身膺重任欣感靡涯惟有愈矢氷兢不敢
一毫少懈愈加奮勉不敢一念自安而已所有三
省豐收情形理合具摺奏

聞仰慰

聖懷謹

奏

覽奏朕懷深慰緣卿忠誠任事有以感召

天和雨暘調順故爾三省俱獲豐收邊氓何慶如之

天人交感捷如影響此理昭然不爽當深信勿疑愈勉寅

畏可也

同日又

奏為恭謝

天恩事本年八月十二日臣齋摺人回蒙

皇上賞賜香珠藥錠茶扇等件臣謝

恩跪領又於九月二十五日臣齋招人回重蒙

賞賜端硯磁器花絹香珠荔枝茶葉等件臣謝

恩跪領伏念臣才識庸愚忝膺重寄撫心自問未效寸

長仰荷我

皇上聖心眷注

訓誨多方既

溫諭之頻頒復

錫予之稠疊似此非常遭際實為逾格殊榮夫人臣輸

忠效力原屬職分當然豈因受一層

深恩始加一倍勉勵但受

恩有加無已而臣子圖報愈難惟有殫竭愚誠始終如一
一。務期邊方寧謐政治修明以仰慰

聖心勉盡職守所有感激微忱謹具摺恭謝

天恩謹

奏

誠能慎終如始何慮地方之不寧謐政治之不修明也

勉之

雍正十三年二月初四日雲貴廣西總督臣尹繼

善謹

奏為奏明雨雪應時春苗茂盛事竊查滇省迤西一帶大理等府於年前十一月間即經得雪順寧蒙化等府氣候溫和向來雪少俱經得雨滋潤迤東一帶昭通東川等府亦於年前十一月間得雪至正月初二等日昭通復得大雪積厚尺餘開春以

來望雨正殷於正月二十五六等日大雨普霑遠
近周渥豆麥菜花及時發生青葱暢茂處處民苗
樂業米糧價值甚為平減貴州所屬台拱遵義等
處年前亦屢報得雪入春以後通省雨水甚屬調
勻臣謹具摺奏

聞仰慰

聖懷謹

奏

冬春既獲應時膏澤春苗自必長茂矣深慰朕之遠念
雍正十三年四月十六日雲貴總督臣尹繼善謹
奏為奏明雨水調勻豆麥豐熟事竊照雲貴地方自
入春以來雨暘順序耕種及時豆麥發生極其暢
茂今交夏令漸次成熟現在豆已登場二麥結實
遍野四月以內即可全獲詢之農民咸謂今歲春
收十分大熟一切菜花苕麥亦皆處處茂盛米糧
價值仍似去冬平減四月初間又連得大雨遠近

霑足臣謹具摺奏

聞仰慰

聖懷謹

奏

覽雨水豆麥情形欣慰曷似

雍正十三年六月二十九日雲貴總督臣尹繼善
謹

奏為恭報大捷及現在進剿情形事竊黔省下游生

熟頑苗勾結悖逆於本年四月內焚劫重安凱里
攻陷黃平新州阻塞驛路蔓延內地臣札致提臣
哈元生親往清平就近調度並咨調湖廣廣西官
兵及飛調滇兵三千馳往策應業經繕摺

奏明奈提臣隨行兵單所調之兵不能猝至雖分頭
堵殺而苗類衆多勢甚猖獗於閏四月初三日逆
苗漫入黃平舊州人民逃空撥防兵丁僅一百五
十名力不能禦被賊入城焚燒房舍臣據文武稟

報隨查平越甕安餘慶相距舊州俱不過數十里
此際急宜駐兵打鐵關以衛平越城并分兵防守
甕餘二縣一面飛咨提臣一面星催前調滇兵趕
赴軍前應用總因官兵不敷提臣雖調撥分防僅
能謹守打鐵關其甕餘二縣止各撥兵五十名前
往逆苗窺伺兵單十八日復湧入餘慶城內焚掠
文武員弁俱奔拒城外未遭殘害提臣隨撥兵飛
堵馬鬃嶺隘口甕安得以保全清平之賊先於初

十日蟻聚攻營大定協副將紀龍正在督率官兵
出營對敵不意姦細暗入城內放火知縣邱仲胆
並無防範以致監犯悉行免脫提臣急遣官兵策
應副將紀龍奮力截殺逆苗始行敗遁城池倉廩
俱得無虞業將邱仲胆會叅在案其台雄丹江逆
苗因總兵卜萬年柔懦無能軍威不振於四月二
十六日圍攻排咱營汎卜萬年遣遊擊姚宅中等
帶兵往援因調度失宜傷損官兵不能取勝及卜

萬年親自率兵前往又復退回排咱營盤口糧已斷於閏四月二十一日守備高謀把總王興泰蔡文魁等帶兵衝出四面受困對敵陣亡並亡兵丁四百餘名丹江鷄講悉被圍困臣據報又一面飛調滇兵一千三百名並將前遣貼防安籠威寧之滇兵五百名亦行調往飛咨提臣如滇兵一到即分一路由清平重安而出一路由打鐵關出舊黃平以達新州兩面夾勦開通大路先固內地再勦

新疆隨於閏四月二十以外前調滇兵陸續先到
惟時清平之賊屢經副將紀龍奮力勦殺附近逆
巢已經焚洗提臣哈元生隨令廣羅協副將周儀
帶兵駐劄清平換出紀龍往攻重安遣叅將哈尚
德帶兵出打鐵關攻舊黃平哈尚德督率官兵奮
勇勦殺於閏四月三十日五月初一日連復新舊
黃平二城直至重安而重安之賊先於閏四月二
十七日又犯清平副將周儀督兵奮擊賊衆大潰

追過大風碛連破老君山險壘五寨副將紀龍乘
勢渡江殺散賊衆駐劄江岸與哈尚德會合逆苗
畏懼兵威俱逃躲山箐紀龍哈尚德又連日將附
近重安之賊分路搜勦斬殺甚多五月初七日提
臣遣都司陳思儀帶兵由新黃平而下叅將崔傑
帶兵由偏橋而上將沿途阻路逆苗悉行勦散驛
路俱通其餘慶縣城賊悉逃遁亦經乘勢恢復隨
於重安黃平餘慶及各關隘佈兵駐防搜洗山箐

餘孽斬殺生擒數千餘衆拏獲賊首羅萬象黎登
高王國俊安國林馬陞雲宋藍保龍登威龍貴林
等黃平一帶業已平定難民漸次復業其仍有藏
匿山箐者現在搜勦廣西官兵二千於五月初間
已經到齊總兵韓勲當遣七百名往八寨援勦遣
五百名往黎平貼防又節准廣東督臣鄂彌達咨
會因聞黔苗猖獗先後調廣東兵四千九百名委
高州鎮譚行義總統前赴古州協勦又撥廣西撫

標兵五百名駐劄丙妹又調廣西左江鎮總兵王
無黨來黔總統廣西官兵臣思廣東距黔遙遠師
行甚為勞費但准咨之日起程已久阻止不及且
貴州逆苗蔓延亦須多兵分佈旋據韓勲具報廣
東頭撥官兵一千已於五月二十四日到古臣查
古州既有廣東官兵前來則廣西之兵可以撥出
另用丙妹地方現有黔兵駐防可無他慮廣西之
石碑汎界連古州甚為緊要隨咨商提臣飛行韓

勲將駐劄丙妹粵兵就近調赴古州將廣東後撥
在途官兵留五百名駐石碑堵禦其餘廣東官兵
俟續到日再撥五百前往八寨兼防都勻撥一千
名駐黎平府貼防餘俱留在古州備用鎮遠一路
前調湖南官兵三千於五月內已到一千八百正
在沿河安營保護糧運分堵隘口乃有沅州協副
將傅為斗於橫塘地方與賊對敵賊衆兵單陣亡
兵弁八十餘名賊勢猖狂四出黔楚官兵分應不

欽定四庫全書

殊批諭旨

卷二百二十三下

四十九

暇於五月二十七日逆苗越入青溪城內燒燬衙署倉房副將柳定國等聞信飛援當時逆苗奔退城池保全臣以提臣相隔尚遠鎮遠一路必得大員統領隨會商提臣委左江鎮總兵王無黨帶廣西兵八百名前至鎮遠總統此路官兵清理內地援應清江勝秉勦洗倡首惡寨其清江勝秉二處屢遭逆賊圍困俱被官兵殺退幸無損失台拱道路雖有阻隔而近城一帶尚在無事隨又據台拱

鎮總兵卜萬年報稱小舟江汛地於五月初五日
被苗攻破千總劉文魁等陣亡兵丁尚損一百餘
名其丹江營並鷄講汛十分危急提臣派令副將
周儀紀龍帶兵二千餘名進攻凱里援應鷄講丹
江又令滇省遊擊王先帶兵一千餘名由麻哈平
定等處沿途勦賊前至卡烏並令八寨副將馮茂
帶黔粵兵一千五百餘名由八寨一路勦賊至卡
烏與王先會合進勦九門等兇寨茲據副將周儀

紀龍具報於五月二十九日涉水渡河頑苗數千
拒敵督兵擊敗克復凱里連日破險焚巢於六月
初四日直通鷄講城汛保全初五日又通丹江前
後焚洗逆巢數十勦殺逆苗千餘弁兵止傷數名
遊擊王先副將馮茂等亦將九門等寨悉行焚勦
副將康世顯叅將崔傑哈尚德又將沿江最險之
螃蟬等寨勦洗擒獲大賊首阿九軍威大振逆賊
奔散逃竄將擒獲之賊逐一究訊知大賊首枉汪

等聚於空拜等寨築室負固此最係兇惡巢穴現
已嚴飭諸將分佈周密併力勦擒其古州之八妹
等寨臣因內地未靜難以齊舉是以密令韓勲暫
緩深入今據韓勲稟報已將附逆之山漣寨勦洗
駐兵山舟等處扼要控制其附近古州以及上江
下江一帶俱各安帖六月十三日接大學士鄂爾
泰等字寄雍正十三年五月初四日欽奉

上諭又調湖廣兵二千名來黔協勦復慮逆苗敗遁攻

犯古州著派廣西兵三千名星往應援仰見

睿謨遠照籌算無遺又於二十三日臣齎摺人回接到

大學士鄂爾泰等字寄雍正十三年五月十八日

欽奉

諭旨一切勦撫機宜無不周詳指示臣跪讀之下感愧

交深查廣西官兵先已調撥二千五百名今廣東

又發官兵四千九百名是兩粵官兵調出已多廣

西同係苗疆亦須彈壓經臣咨會廣西督撫提臣

停其調遣湖廣官兵已准督臣邁柱咨會遵

旨再調湖北兵二千名委襄陽鎮焦應林總統已經起
程現在清平黃平餘慶平越等處俱已平定鎮遠
施秉偏橋都勻黎平俱無疏失大道已經開通其
鎮遠上下尚有數處逸賊出沒正在搜勦至上游
地方俱各處處安靜從此大兵雲集臣凜遵

聖諭與哈元生悉心商酌竭力辦理誓必淨掃妖氛不
敢稍存姑息仍貽後患所有屢報大捷及分路進

勦情形 臣謹據實奏

聞謹

奏

覽頑苗如此一番猖獗朕與鄂爾泰暨汝等實無顏以對被害之邊氓也若不加意撫綏致使鋒鏑之餘復填溝壑於心安乎須極力辦理務俾一一安集得所以贖前愆倘吝惜帑金及或貪官污吏乘機侵冒而令無告窮民不霑實惠則更不可矣地方守令等官如有奉行

不力潦草塞責者無論向日之官聲優劣即以溺職叅黜其侵蝕冒銷者一面拏究一面題請正法示懲將此諭遍宣滇黔在事各員悉令知之

同日又

奏為奏

聞事竊元江賊首老常小名頭二犯實係兇惡巨魁先經軍前尋獲因鎮臣楊國華不即拏解令其招緝逸賊以致脫逃遁入外域臣已據實

奏明欽奉

硃批諭旨指示諄切令速行盡力擒拏臣凜遵辦理嚴飭文武多方躡緝嗣據楊國華報稱二犯攜帶男婦一百六十餘人由普洱整法出口逃入南掌守備馬漢勛等帶領兵練追至交界有南掌頭目叭細里松法具結承認拏賊獻出等語臣查南掌原係恭順之國今賊逃入彼境止須行令拏解仍於交界要隘處所駐兵堵禦不許越境騷擾當即飛

行遵照嗣據普洱文武稟報據南掌叭猛花稟稱
雍正十二年例屆貢期該國已恭備象隻即擬起
程因逃賊老常小名頭勾結該國卡高夷民肆行
滋擾現在督兵勦擒俟拏獲逃賊時同象隻一併
解出等語臣因飛行獎勵飭令速拏逃賊不可縱
容貽患一面先行入貢毋得稽延去後節據文武
稟報雍正十三年三月初七日南掌差夷目解貢
象二隻到普據稱表文貢使因叭猛花帶兵拏賊

未能料理俟續後到普等語又據叻猛花稟稱逃賊勾結卡高甚屬肆橫該國土兵懦弱兼少火器請發官兵幫助前來臣當即詳細指示鎮臣楊國華令其相機辦理隨經楊國華令守備趙弘祖帶領兵練駐劄猛腊界口遣把總李燦帶領官兵五十名土弁施糯利等帶土練四百名於四月內前往南掌補按地方協助勦撫而卡高各寨夷人一見官兵臨境即皆威畏投誠老常小名頭勢孤力

竭無路可逃於閏四月初九日帶同男婦一百餘人赴營求撫把總李燦將該犯等一併帶出普洱南掌地方已經平定臣據報飛諭楊國華等立將老常小名頭鎖拏解省去後茲於六月十八日已將老常小名頭並其妻子等解到發司收禁審擬正法並據該鎮府具報五月二十日又據南掌解到餘象三條六月初二日自普起程赴省貢使表文隨後起行等情到臣查元普賊首早已斬擒淨

盡惟老常小名頭二犯逃入外域今仰賴

皇上德威遠播訓示周詳二賊俱已就擒南掌人民莫

不感戴

天恩歡聲雷動除俟貢使到省另行


題報外所有擒獲賊首及南掌入貢緣由臣謹恭摺

奏

聞謹

奏

此二要犯既經就獲元江地方嗣後可望無事矣



欽定四庫全書

硃批諭旨
卷二百二十三下

五十二

硃批諭旨卷二百二十三下